




林居適筆

丙字

十



居林適筆引

儒者性分之樂不在境遇間即以境遇論惟適然而
來適然而止來不知其所來止不知其所止庶幾乎
境遇之樂無殊性分且乃若營精藻翰溺志歌舞有
意以為之者皆苦因也即疏泉剔石架壑籠立稍
著意便覺累心甚矣適之難言執就予身自為証當
居官之日亟思散髮投簪以為快心娛志莫過山水
園林是以乞身歸來即有卜築之興然初不過山巔
數椽耳構之者不覺煩遊之者不覺異主人與山靈
若相安于無事焉斯適矣嗣後構置彌廣經營弥密

意匠心師每至形諸夢寐寒暑勞役幾以是益我沉
疴及於亭臺位置樓閣參差遊人駢接以至客遊焉
予亦遊焉是予不過衆客中之一客耳乃寒暑勞役
則衆客所無而予獨有也是衆客處其適而予獨處
其苦予真愚公也哉善乎范文正之言洛陽園亭相
望誰禁吾遊者奚必締造為也李文饒作書誡子孫
不得以平泉一木一石與人其在淮南浙東作憶念
山居詩數十首皇：如不及以視文正孰若孰樂予
亦可以自悟矣然則予必將以天地為室宇萬物為
侶徒逃之于無何有之鄉而後為適乎非也性分之
中乃真自得其所或借之境遇者則惟適然而來適然
而止來不知其所來止不知其所止斯適矣又何求
焉寓居士龐准書于讀易居

丙子歲

正月初一日五鼓起肅謁家廟畢詣神宇拈香歸諸兄弟
課文予作元旦七律午後至桐山及梅里辰墓歸作書
致王澄川

初二日拜族中尊長與諸兄訪王雲岫雲瀛及子遠兄弟
雲岫構室精工同有^行羨慕之不已者歸而王氏兩兄
即來報謝午後復出至近村訪親友及晚始歸

初三日入城至外祖家便道訪朱箭里值季超兄翁艾弟
在復飯於外祖家謁^文廟晤秦廣文弘忠抵舟別駕嚴百
章來晤富人報暨陽路父母相訪再乘舟與報謝之乃

步出西廊門棹舟以歸

初四日梵通師偕諸衲子來訪載之舟中適季父及止祥
文載弟俱在季父與衲子講究釋典同遊寓山而歸可
稱一段佳話午後懸燈於舟奉老母燕賞是晚衲子印
山及錢溪雲至皆善於堪輿者同季超兄先入化鹿山
初五日懸燈為樂適許平遠公祖惠以魚金扁額手書謝
之晚小飲至醉伏枕移時乃登舟至平水道遇微雨

初六日雨入化鹿山半道而霽展謁畢歸見山麓梅花盛
開款有吟而未就便道訪郭尔張侯印山溪雲至即放
舟歸

初七日同季超兄及錢溪雲至寓山飯于塔院偕至和塔
項里為先兄卜地薄暮始歸觀童子演仙戲

初八日舉放生社于六竹庵諸友咸集茶罷遊柯山諸友
別予留寓山下集晚歸遇微雨與內子登舟即宿于舟
中

初九日早至外父家祝外父壽小憩舟中與外父飯畢作
侯晉明公祖及復商恬軒書偕內子歸途中值鄭九華
數語別去

初十日趙應侯過訪與之小酌午後憇于舟中乃邀王雲
岫王雲瀛及潘鳴岐小酌觀棹後記

十一日將沈兄昌期已即至富山晚燃燈以卮酒奉老母
觀幽園記

十二日舉文昌社予跨蹇驢先歸作富山下築七律與社
中友小酌畢同季超兄翁艾弟至中梅村後梅村訪友
是日得安蓋卿及寧方兄書即報謝之再得睢陽州後
一稟寄先大夫名官看語鳳陽府經兵火之後文卷盡
失看語為州後抄得閱之不勝慨嘆

十三日至富山聞外舅將至中道適值沈素先董天孫過
訪偕與外舅飲罷同何芝田董天孫至富山適子仙與
諸友來遊歸而族人有置春酒邀予者杯斝之興頗洽

十四日董天孫以宿來所作詩相示石兩師過訪坐談于
醒菴偕至富山時何芝田季超兄亦在石兩師提醒予
者甚至午後邀族中尊長子弟酣飲盡醉時遊人翫燈
駢肩接踵有太平之樂而先一日間友人陳璧生自和
州歸言州城已為流賊所破馬訥齋舉家被害吾輩甕
處南偏已有怡堂之慮矣

十五日手植晚蘭坐書室中如與幽人相對不復知豪華
之可羨午後小憩起單槎仙以燈謎相譚季父作燈夕
二律以流寇為慮寓規諷意也泊晚觀燈士女愈盛幾
無容足地予獨坐草候文湛持及與喬明懷書

十六日至富山方周 上作間朱氏昆仲至趨而歸傳流
寇已渡長江相顧躊躇朱四兄因述成都解圍時事座
中為之氣壯比別去復至富山已不覺日之夕矣

十七日偕止祥兄及齊五兄至富山壘石成峯觀者幾不
能辨真偽飯於菴中歸延近村諸友小酌

十八日致書喻醒拙公祖詢流賊渡江之信且力止丈量
田土之舉再以一書候王康字年伯陳自譽至小飲罷
偕內子至富山晚歸作書與金楚晚

十九日得秦廣文弘忠書示以吾鄉鄉賢姓名且謀所以
祀祠字予以手札為謝族中兩兄來亦示以里後之費
予將與邑尊看釐筆之午後至富山郭公祖以書來問
求歸之計予謂決計求歸須在事竣之後且地方虞流
寇震鄰拂衣非其時也因與商脩禦之策再作書復姜
光揚

二十日與季超止祥兩兄同至富山壘築花石午後予獨
詣彼壘石幾告竣且搜剔山中有古石奇峭者不覺撫
掌稱快舟中較先人尺牘盡半帙

二十一日間修鱗兄之變為之慘怛出錢載甫於蓬萊驛
載甫未至泊舟於會龍橋下偶遊錦浪園書舍數楹亦
小有致送載甫行二三里予先別歸是日暄熱如初夏

二十二日狂風驟發王金如至正興晤語間西邑父母避
雨風於彌陀寺操舟候之則已行矣午後稍理恒產之
籍

二十三日方款入城適虞山毛子晉李孟芳兩兄過訪出
錢牧齋王康宇二孔子晉且惠以所刻甲乙集孝經注
疏數種與之駕舟遊柯園并偕止祥兄至富山歸酌於
淡生堂復移舟桐山之陽譜韻牌為樂小飲至夜分就
宿紫芝軒

二十四日入城舟為風阻不能前舟中為劉平林作書
致四明范年伯午餘始晤許平遠公祖即見領出晤之
即投謁一二親友未修歲事者晤金楚畹陳襄範歸寓
寧陽西表生至示以名宦祠記知先子已載寧陽之祀
典且祠宇輪奐一新皆西表生力任語次不勝感愧與
之晚酌即邀宿於舟中

二十五日出於龍口廟會金楚畹公謁李映碧公祖午後
李公祖見領仍出報謁諸親友於姜玉洲書室中值鄭
涵宇余武員復晤朱茂如詢都門近狀始知今上廷
簡政府事晚歸與西表兄小酌

二十六日劉大兄王大兄皆早至送西表兄去出吊陸瑞
亭及葉孝廉及乃翁便道訪金乳生翫所蓄花石殊可

人意飯於外父家歸而義興任兄名玉衡者見餽予以
平頭先送之抵家園留與小酌有醴大使顧姓者及劉
氏表侄皆後先至別之歸舟入暮與任兄秉燭快談即
辭去

二十七日至寓山令舟子邀止祥兄至纍石方就緒聞鄭
九華至乃歸午後復邀九華止祥兄入山匠工拽巨石
邪許至晚始抵山之半先是許公祖約於次日至園作
晤間醴使者行事之期遣使辭却予於是晚入城邀之
二十八日雷雨時作時定止寓後出謁蕭山嵎縣諸暨三
父母皆不值訪張介子歸寓復出謁餘姚亦不值飯于
介子齋頭偕介子宗子至斫園許公祖觀水滸記席
方半談於鱸香亭至夜分乃罷

二十九日錢麟武未晤即往報謝值徐檀燕在座歸寓飯
後至外家陪許公祖席觀九錫記竟日雨

二月初一日邀張宗子介子平子王升之舟中小酌先與
宗子介子叩快園盤桓良久升之始至與遊蕪葭園值
平子於中途出都泗門至負園、為外父所構在西施
山之左坐響屨亭觀粵浪無不奇詭入舟飯罷復至瑞
蓮亭值微雨登舟再酌至陸氏園已荒蕪矣劇飲俱醉
乃放舟歸

初

二日與內子閒坐朝來閣而後山色青翠襲人不覺撫掌稱快金楚畹來晤羅孝廉名覺來者亦來晤午後出晤姚履泰以小舟至張介子家值平子道子皆在與登萬玉山房之融真堂山色較閣上所見更有異焉者諸山如米老袖中石可列置几案間再入五洩家陟巘華閣從飛雲棧折而下於其家之後戶出登卧龍山入陽和書院憩筠芝亭則會稽之西南面山也亭在融真堂上渚山至此更為明暢然不無一覽易盡之憾登霞外樓惜東北渚峯俱為竹木所蔽別平子去再與介子道子賈勇登怪山入東武山房更從朱箭里乞開一徑得遊千峯閣遠山多客為烟雲矣王稚夷兄適來與之從息柯亭步歸

初

三日得董持阿書惠以佳卉四種適上海喬苑風兄來晤為次日小酌之約出於劉氏家會外父一談適錢麟武至乃別至舊寓值金楚畹予復晤府庠西廣文與商修改鄉賢祠之庠至錢德輿生處值邢淇瞻姜玉洲余武貞鄭涵宇同晤賈道乾公祖出即放舟歸

初

四日早至富山以吳中友喬苑風兄將至乃促歸與苑風飲酒晚別去

初

五日入城舟中閱春秋左傳及杜詩再以一書致外父

及內兄朱廣文以札至以賢祠祠商隨後之訪夏孔林於其書室中得觀識世語及頤老九議飯後出吊於董姓至余武貞家與金楚畹朱茂如公請賈道乾公祖

初 六日與鄭九華至富山辰後老母偕諸媳諸女亦至觀焉

初 七日至富山會計石工之後

初 八日雨鄭九華入城予與翁艾弟至富山待潘鳴岐王完宇沈克俞至飯於六竹庵放生午後出訪王雲岫舟中閱杜詩次日擬邀外父外父以疾辭

初 九日至富山時聞孀母病小劇午後微雨齊企之室偕歸與陳自學同宿

初 十日雨甚邀廣文周又新及曹君令儀秦君弘忠飲步自密園放舟於富山松風怒號如千百人哭泣聲遊興不為阻及暮始別

十一日出柯園問疾於孀母遂以小舟入城舟中作書與許年伯梅父母又以一書與陳益吾沈雲芝沈大來至蓬萊驛間金楚畹行復以一書送之抵富會中諸友王金如王俊仲秦淡如吳與泰金士望陳汝理錢千之及季超兄咸在呂梅夫後至午後稍習靜坐晚秉燭深談金如所以規予者切中膏肓令人通身汗下時里中傳

○
有丈田事予慮驛驛為害擬作公書致當道中止之

十二日晚起稽首於金如謝其教言自茲稱先生執弟子
禮焚香靜坐覺此心散亂愈甚每經行念佛輒以爪搗
手指幾為膚裂因與金如言浮念倏起倏滅終無了當
然易起亦滅耳倘喜怒哀樂有如浮念之無碍於太虛
亦庶幾乎金如言喜怒哀樂因有根在故中和難耳因
不怕念起但須認得此心即桌子碍磚無非是心金如
將指明其故予止其且勿言待予靜參之

十三日別諸友出於越王祠前與內子同舟拜掃外母墓
會外父於龍華寺前小憩西施山之角園飯後歸途
中遇驟風泊舟至夜半始抵家

十四日老母以嘔吐伏枕亟延醫王培元調理午後路友
名之陞者未晤出路父母書相示是日以孀母病劇欲
為治後事亟以一字致季超兄自朝至暮出候問者三
最後齊企之自城中以季超兄語未商酌亦偕之至柯
園時已漏下一鼓矣

十五日以小舟入城於城隍廟會姚競初師余武貞董黃
達徐檀燕鄭涵宇邢淇瞻錢德輿公晤西邑父母力言
丈田換繇所以不便狀歸寓與呂梅夫王金如飯後別
去適何芝田至齊企之亦在遊於樛木園市花數種歸

歸而借諸兄弟至柯園候孀母安是日舟中作鄭玄子書院先子文集一卷

十六日得鄭遊戎程把總書適先子有書後李姓者作閩中巡司以任滿未晤復鄭遊戎書去與鄭九華至富山
十七日與諸兄弟至富山先是周又新以題石佳翰來且惠以一聯予今巧工刻之石諸兄弟先歸乘暇作書復程弁及李玉完午後小憩舟中夏孔林見訪出王弁名先澤者一書夏孔林別季超兄復來見山頭落日始歸
十八日作書致淡中約年伯又以書候路公祖路父母而昆季何芝田至時德公兄以嫂壽日設酌午後觀優人演鴛鴦棒記

十九日與何芝田至富山值遊客在一茶而別適微雨後山色更佳舟中作書與昆陵蔡二守及復王弁午後觀翠屏山記燈下校先人文集有俞生世顯昆仲來晤

二十日入城於舟中閱春秋半帙杜詩數首款吊陸放翁祠以客在不得入泊舟於拜王橋午後至鄭訥庵年伯家同邢淇瞻余武貞公請錢麟武及錢德輿返舟中宿抵家

二十一日同何芝田至富山督奴子澆卷種竹予錄向所作卜築詩芝田屬和一律適僧伴雲至芝田遂有孤僧

霞外來之句

二十二日與陳自學何芝田約將開社於富山以天雨中
撤午後閱馮養重所市書得太乙六壬諸抄本頗為珍
重是日金秋湘勇至因問林自名公祖自武林歸將遊
吾園

二十三日何芝田別去單槎仙張達吾皆來晤與內子至
富山因候孀母午後遣奴子入城候林公祖坐書室較
先子尺牘畫一卷寧方兄兩侄來

二十四日出至柯園候孀母安時何芝田有相邀之約以
一字遲其期暇坐書室命童子薙池中積草以植新荷
二十五日至富山同野老步行田陌間見平疇如繡因識
田家之樂午後老母至山亭與陳自學及諸兒亦至落
日嘶山始返往返間俱候孀母安

二十六日方會計予家糧額趙應侯至共讀陳自學和予
富山下築詩 午後方移舟款至富山以微雨中止舟
中再作書辭何芝田之約且乞櫻桃數本

二十七日王雲岫至偕二三親隣來和解張達吾爭訟王
去與趙應侯陳自學及德公兄放舟富山招牌作喜晴
七律飯後候安孀母歸薄暮風雨驟企之至

二十八日趙應侯款去以風雨止之應侯有瓶卷之咏予

為和一律午後別應侯較先子尺牘晚作寓山草堂成
七律一首

二十九日款至柯橋中途有二月周君尚信來晤談久別
去時已迫午止與止祥兄遊寓山即返午後同德公兄
翁艾弟訪王雲岫薄暮微雨

三十日步自田畔遂至柯橋登藏經閣茅心鏡潘敬亭皆
來晤同諸衲子參佛已別歸舟中作復張太美一札咏
寒食五古二首午後作札復陳襄範得來澤蘭都門所
寄書金秋湘昆仲至尹且如亦來訪談久及暮乃去

三月初一日馮鄴仙偕其弟沛祖友應佛大來訪飯罷諸
諸兄弟同之至柯園寓山再遊七星岩觀魚於清水石
是日為清明越有踏青之俗鄴仙昆仲適至遊情頗暢
談至日暮乃別予贈以雙鬟一人而去

初二日王金如至叩予以萬物皆心之學予無以對乃取
楞嚴經所談七處微心觀之午後同王金如出於柯園
於孀母脉金如別去入城予操舟邀王雲岫王雲瀛小
酌於舟之臺上時天氣初霽水光與山色相映不覺披
襟叫絕劉北生適至與觀社戲乃歸舟中為尹且如作
札與嚴琢菴姜光揚

初三日內子至外家予區處家務已德公兄作至邀王雲

岫雲瀛王子開子闔劉北生金大來泛舟於壽勝埠步
謁壽臺寺以小舟至刑塘歸泊舟於新橋與雲岫登寓
山別諸客抵家董天孫待予於密園予即與訂浪遊之
約

初

西日出於柯園送文載以掖貢入都偕董天孫陳自譽
及同理兩兒放舟南塘舟中作書與許平遠謝象三陳
襄乾午抵徧門謁兩邑父母訂舉酌之日便道至外父
家婦舟適齊企之至與諸友登稽山書院出城至六和
庄掌葉山房及水印庵薄晚舟至小隱山下秉燭遊錢
麟武所構怡園舟中作上巳五言古一首

初

五日曉起再遊怡園自山至巔石甚奇峭披之得古
人題咏字放舟於斑竹菴汲泉啜茗令小師持一字邀
何芝田出晤午晌至姜公何芝田至偕遊蘭亭山行無
輿馬幾於蠱足而不知其勞歸舟作重遊蘭亭七律又
作夜泊小隱山七言及遊怡園五律別何芝田於斑竹
菴乃入城泊於龍華寺前邀內子入舟諸友別以小舟
同至陡豐

初

六日舟早泊陡豐起謁張神與諸友散步市廛間晨未
龍舟漸集老母以他舟至士女喧闐蘭風粉雨極遊觀
之盛午餘龍舟散歸登豐陡山一名越環山北接海南

揖秦望諸峰極目甚暢歸舟從蝦蟆山下巨石磊
米老袖中恐未易得此晚至昌安門內子婦外家予
仍與諸友放舟樊江舟中得觀龍舟七古一首陡豐
山五排一首

初

七日從樊江移舟至曹山遊青棘暢宿二園及石簣
山房從護生菴放舟出水宿登吼山早宿遊陶氏別
業更策杖登山顛坐卧一天石下作蝦蟆山五古一
首放舟至陶堰遊鏡漪讓木後樂三園復至漚谷為
陶長吉所建也縣衣山橋北至道墟宿登佻山即宿
於仙姑廟天風飄漾大地皆作波濤登眺之間令人
叫絕

初

八日五鼓起觀日出為雲霧所翳赤輪至天半始見
之然暎帶江海金波蕩浴亦一奇觀也入舟飯後以
小舸遍觀道墟村市縣此至賀家池遊范氏庄飯於
錢君之觴濤國賦五律二首粘之壁乃去更至後堡
訪徐日觀仍從樊江進舟泊於都泗門歸途見獨樹
港之麗澤小築亭臺位置極佳以孟友方閉閣不得
入不無伊人之想舟中作曹山五排十三韻登佻山
七古之半

初

九日早至西施山祝外祖母壽聞之外父言今

上以進言拔武舉為給諫亦我朝一奇典也與張介子飯後入城予步訪詩僧可一得其鬻琴諸作晚足成偈山七古夜即放舟於平水

初

十日從庄前入化鹿山展先子墓自先子初卜葬時予未至里許輒悲不自勝及數年拜墓乃泣更數年惟慘憾於中而已哀慕之思何以日減書此一段更有他疑者數則盾之王金如觀陶石梁小柴桑錄抄其最透發者數則

十

一日兩老母以阻雨不至與諸兄弟莫享已午後出山中道有范氏庄為季超所買遂從而觀焉舟過鑄浦遊梅圃溪流環遶山色掩映勝地也夜歸抵家

十

二日莆友鄭生學閔羅生太素來訪鄭自都門來道緡紳樞楚囚禁之狀言至此令人名利之心不得平淡吳中舊書後顧姓者亦來謁草數字復諸舊後相聞者即與德公止祥兩兄翁艾弟赴王雲岫雲瀛及潘鳴岐席觀西樓記

十

三日莆兩友別午後與內子至富山讀書及暮見落日啣山乃歸

十

四日區處家務應接人事至薄午枕未已心頗厭恨安得一解脫方乎止祥兄同王子仙來訪談少頃即

別自此開門較先子吏牘至燭上犹未已

十五日錢溪雲至飯後與之至郡山及祝家灣卜地時
山雨歇未暮色杳霽以小舟行諸岫中情懷甚愜便
道至寓山與無迹師生話松下再至柯園與叔父談
詩乃歸鄭九華至

十六日初霽朱明京師之長公至旋別去與翁艾弟至
白洋赴朱仲含昆仲招飲後步海塘遂遊朱士服之
碧園再舉酌觀卷筵曠記時朱茂如在座楊石收後
至暮雨甚宿於舟中歸

十七日入城邀兩邑父母席時在天台尚未至乃晤姚競
初師送請啓再晤陳襄範歸
十八日較先子吏牘作書寄鄭壽子姚玄叔王伯彭汪
然明午後偕鄭九華止祥兄至寓山值雨歸而陳自
警至晚作書與寧方兄

十九日微雨觀楞嚴經七處微心

二十日霽葉瑛石至午後并偕鄭九華先至寓山後以
小舟從之卜地邀錢溪雲於頃里洎至秋湖日暮矣
是日得張太美杜攄赤書隨復之又作八行與玉筍
馮留仙

二十一日與葉瑛石錢溪雲鄭九華至柯園邀叔父止

二 祥兄同遊富山午後予與諸友復至疊石竟上乃歸
二十二日早入城道經道士庄與葉瑛石泊舟下地泊
晤西邑父母即放舟歸毋舅表兄追及談於舟次

二十三日督奴子掃徑候西邑父母杜攄亦公祖有使
至手作一札報之午後與鄭九華至富山有僧來訪
別去與止祥兄談於柯園得季父所作富山下集七
言古

二十四日與止祥兄出於五里外迤西邑父母午餘始
至舉酌後徧觀密園欲遊富山柯山以日色薄晚不
果行時張撤藩父母抱消渴之疾為予勉坐至一鼓
乃別

二十五日偕族眾至桐山及梅里尖山拜祖訪陳介圭
於梅仙庵之旁有書舍數楹雅靜可觀歸登海山小
憩於王雲萊之庄及沈讓堰邀王雲岫至富山與陳
自譽鄭九華止祥兄奕遠任暢飲及晚

二十六日為華亭令張太美致書於李金我族兄自閩
歸得寧方兄書薄暮發棹至天樂鄉拜墓過柯橋與
鄭九華散步讀徐義士碑義士弟為虎傷追擊虎必
得弟乃歸當事者義之為立碑道傍舟夜行

二十七日晨起舟已過羅山及江橋午後易小舟於白

雲塘抵臨浦又更舟從江行風雨驟至及抵岸已有
霽色晚宿於山莊

二十八日天雨拜掃事竣延鄉人小飲修歲事也有鮑
覺凡者為性泉居士任因得聞性泉篤行修持狀觀
其所著天樂鳴空數章午後復繇江行渡臨浦抵予
舟已薄暮矣雨徹夜不止

二十九日過滬後款遊趙伯張之兩園以雨故不果往
午後抵家路皓月以使者相問且詢以吳中利弊予
為詳告以清訟清賦更後除惡凡四款幾千餘言顧
九疇亦有使至旋復之予自廿六日登舟約三日夜
閱春秋方半卷作復侯豫瞻書二通

四月初一日以一書復許此思入城奠潘與偕夫人及
馬芝嶠太翁飯於外父家出至西施山奠商瑞軒妻
叔歸途於霞頭探沈氏意園及不暮軒主人出與予
談久送抵舟次乃別

初二日與翁艾弟至峽山訪何芝田舟次值雨作書寄
葉慕同葉督學江左先子兩地名宦皆其所行書中
致感再四又作書復顧生夢麟又為錢懋士作蒼壁
制義序與何芝田訪其族大魯越晉和陽諸君舉酌
罷觀芝田近所卜築處歸途又作書與寧方兄

初三日初霽放舟南塘獨登鏡圃之高閣從鏡圃西北
去半里遊淡園出而泊舟偏門作書復許平遠向在
天樂山中聞有逸秀才者善搏虎因薦之許公祖俾
充偏裨之選飯後赴錢麟武錢德輿

五桂記子夜德輿復出家伶倚觴晚宿于舟中

初四日早至九曲寓與章凝如晤語駕小舫謁謝錢麟
武因得遊文漪園晤劉迅侯兄歸寓陶石梁先生與
諸友次第集座中拈士君子立身功名當以致君澤
民為事勿徒從利祿起見時得觀劉念臺先生召對
記注因共嘆致君之難王金如拈過主於巷納約自
牖義陶先生去與諸友步王敬同所構園在卧龍山
之趾歸寓方少憇諸暨路廣心父母見訪出報謝之
不值歸寓復晤姚履泰

初五日錢麟武過訪晤別去於越王祠艤舟待陶石梁
迎之至舍時從遊者為王金如章凝如陳起潛及鄭
九華季超兄也未刻方抵園中設小酌已同遊寓山
時暄熱如深夏晚飯罷予與陶先生寬心學之旨陶
以靜參相勉

初六日陶先生出訪王雲岫予坐書室作書致王康宇
杜攄亦同赴德公酌午後諸友別去惟王金如章凝

初 如在于為陳友作書致余二機張玉符及袁瞻標
七日與鄭九華簡官遊時諸友所贈扇頭凡五百餘
柄因憶古人言一生能著幾輛屐予以此扇供揮汗
能消幾何竊有同慨午後閱性理予之所見與梅翁
所言天下之物無不見於吾心是理之中稍有異同
因以看之王金如頌為首肯

○ 初 八日遣奴子過武林候林希菴黃跨千諸公祖偕諸
友及諸兄弟至富山作放生會有季君者適至旋別
去諸友集於竹菴享伊蒲供值天雨漸散去予獨與
王雲岫王子閣子昌劉壯生及德公止祥西兄翁艾
弟小憇富山同赴止祥兄酌予先別歸值石雨師在
密園予詢以赤子入井一段宋儒言觸物而感予謂
有物可觸物與我又成對待如何是一體難至夜
分始罷

初 九日石雨師別與為富山七日之約予因俗務紛紜
恐妨靜課乃預為料理午後整吳中尺牘付管城錄
之

初 十日張太美有使至予手復之以用靜持動之道相
勗時張有推敲之者故也與王金如章凝如鄭九華
及季超作靜課於富山約於辰後坐香二次午後坐

香二次晚坐香一次各以香半炷為節晚於月下送王金如至陡巒

十一日 暄熱流汗靜坐中神思更覺昏亂出靜閱楞嚴經究七處微心之旨

十二日 兩王金如携程自昭至予靜究心体竊意心体同於太虛萬物不能離空虛豈能離心、外又豈有物金如舉磁爐曰此亦心乎予應之曰心金如曰香在何處予不能對

十三日 僧無量過訪頃之石兩師至談法甚暢師勘驗人學問於章凝如性光充滿處未為許可

十四日 與石兩師披閱楞嚴經師於經中錄所遺者講解與諸說異是日得王六宜董持阿書陳自譽以持阿之招款赴試天台予力止之

十五日 石兩師別去予與季超兄白山抵家候老母少頃仍還山午後德公兄携齋供邀季父坐話山中風雨甚厲及秉燈而歸

○ 十六日 予以心與萬物同体者蓋萬物無物因見性聞性而始有合眼無見塞耳無聞即無物矣以是見萬物總是一心金如以予於無物處尚信之不確是日午後天霽

十七日與諸兄撤靜課方欲出山而錢潘二友以柯山地理有欲傷之者走高於予頃之王氏母舅亦至得章傲弦書予同母舅抵家飯後別去稍簡吳中尺牘心疾舉發

十八日季超兄設酌舟中召予惟飲同席者為王金如章凝如錢溪雲鄭九華陳自譽無跡師及德公兄翁艾弟欲於上方山下地至後梅舟為橋阻逆之南塘自壺觴至中堰下三地最後者吉遂放舟歸

十九日王金如章凝如別去書憲無事酣睡頗快起閱張芝亭所示稞語多見道之言予為點定且評題數語以一札復之更為章傲弦作一札與鄭銘章

二十日出吊族嫂齊企之至得王得一札旋復之去二十一日與鄭九華至寓山小憩于約室午後放舟寶城寺別以小舟至恒圃

二十二日錢溪雲至同鄭九華季超兄下地於上方山飲龍泉午後舟從興浦抱盆楊家街薛獨袁家坡再下地於呂氏之小漁磯日晚乃歸

二十三日奴子自雲間歸得張太羹札再出下地便道至寓山季父同僧完璞同去放舟鑑步於桃巷塢諸友登山巔予不能發焉再澁湖塘至王家陡門謁馬

太守陟象山遂自賓舍北折至滬後遊趙伯章之雨園值張子即別歸

二十四日偕錢溪雲鄭九華季超兄至富山午後復出於郡山及祝家塢卜地

二十五日龐釋龍過訪適趙伯章亦來俱留之小酌別去午後閱楞嚴經檢曾謙甫史荷汀所為越中名園詩賦

二十六日入城謁姚競初師午後即邀姚師同姚履泰小酌燈下作書致路廣心父母

二十七日同止祥兄至朱除吊朱楊菴薄午自林頭過橫篠湖波光百頃西北一帶不減明聖也但南面山稍遠身吊畢仍過湖天色漸昏詢路轉襟乃飯於東浦臥舟中至黎明方抵家

二十八日出至富山開松下作路透迤得一山之勝予向咏卜築詩有偶借松為徑之句若先之懺也午後止祥兄偕趙水生來王雲岫亦來為予相度構閣之所

二十九日出至富山偃卧之餘得以暢閱春秋王雲岫偕姚完赤携酒饌相餉止祥同至長歌振於林木時盛暑忽有風雨驟至乃散歸

五月初一日入城晤李映碧公祖同晤者為邢淇瞻潘
鄧白謝岵雲錢陽明予為李公祖言八壩私稅之當
革府庠賢祠當建李公祖為予商衛軍之改折上供
之差解及劣等諸生之預考皆地方急務也歸于舟
晤莫徐薛三友再晤楊石攻贈以酒鑿數紙頃之何
芝田來予款借之至六園不果予乃獨與齊企之去
入園草芥爛熳多不辨其名快嘗之後邀金乳生其
遊選流園乃放舟歸

初二日兩午後體中稍不快然枕晤岵之四尹郭君及
醫者

初三日兩午後瘡發抵暮方止

初四日病瘡不出然尚勉理家務有爭產者誑鬻于予
予為平之其人感泣而去

初五日諸兄弟共談于書室頃之瘡再發不能理蒲觴
不知佳節之過眼也

初六日瘡已然體倦竟日卧書室間閱陽明語錄李超
兄教以念佛數息之法甚得力有唐友同庚白雲間
來不得晤

初七日何家姊來與諸兄弟談于予之書室午後里中
舉戲觀者如狂予惟靜坐或偃息已身是日得胡厚

菴及寧方兄書

初八日有吳友國鑰自松陵來亦不得晤得沈因仲吳
來之二書午後兩徐日觀來為作公書借邢淇瞻致
之張撤藩父母

初九日兩憲無事閱春秋半帙

初十日邀吳友國鑰作晤田之飯作

之又為郭四尹草壽文賀劉宛毅父母

十一日兩得文載第報知廷試居第五

十二日彭天錫見訪借之過富山遠王雲岫亦至與之

謀卜築之計彭別去午後作書復趙應侯張宗子金
尔玉師及高君梗是日有文學四人偕高賈二十餘
人以八壩私稅予為條章群來言謝予甚愧之

十三日偕鄭九華至富山定石友榭之址適俞君世灝
至午後祀閔神演戲是夜月色甚佳與諸兄弟談于
澄鮮亭

十四日與鄭九華至富山予坐約室觀春秋畫半帙午
後張象子來晤是日得楊漣瀾書

○十五日作書致撫軍喻公祖痛言鄉兵及衙官委相差
後買牌欵案守提之害午後諸遜之徐企之來晤再
作書與姚通所杜攄亦

十六日雨送鄭九華至暨陽午後霽至寓山族中以訟事求許予同之至柯園晤止祥兄

十七日作書與王稚夷兄乞建蘭再從金乳生乞草卷數本又以數行迎陳自警而甚午後觀楞嚴評杜詩十八日雨令童子掃除北牖以避暑錢溪雲與張酉度至午後觀楞嚴經得楊石攻書惠以治中消之方鄭九華至

十九日夏至雨祀先已午後稍霽同鄭九華至寓山

二十日晴同鄭九華至寓山以祖兒出痘頗為關心即歸午後閱楞嚴經燈下閱杜詩是日得李子木書念予甚至書中且為募緣僧定水介紹

二十一日同鄭九華季超兄先至柯園旋至寓山於山中得李映碧公祖及張象子董天孫商大兄各札隨手復之暇閱春秋季超兄閱禮記飯後小憩乃駕舟歸

二十二日同鄭九華至寓山歸午後醫者周敬蘭至言同兒痘頗難之遂留之倍宿次早乃別

○二十三日鄭九華獨至寓山予留家為同兒治藥時痘証危篤舉室惶惶予處此坦然無得喪之慮不加排遣是豈從學問得力乎午後督園丁除竹作除竹五

言古晚醫者陶友藤生至

二十四日醫者凌友少廣早至以為症在不起與陶藤生意合午後周敬蘭金素行至皆是凌說獨馬性聚為為涼藥所悞應用熱劑與諸友爭辨甚力李明初至則袒馬予遂從李馬二君所用方是日得許平遠公祖書以長言復之

二十五日同見痘少甦益信溫補之效午後王少石至其說與二友合始知涼藥之真誤矣留少石同二友宿李明初從事西學與李超兄辨難媿

二十六日得張留孺公祖書王少石同李馬兩先生眷同見痘言痘起而氣血不足相顧無措頃之相繼別去以為不可復救矣及晚醫者朱清宇至為之調治又似少有起色予中夜數起疲甚然為之治後事則覺此心毫無散亂

二十七日復邀李馬兩先生至適謝爰謝亦自都門至謝亦精於痘疹者與王少石斟酌下藥群議皆合二十八日同見方用溫補之劑脾脈頓傷溲泄驟下共為驚愕自是生機絕矣醫者皆謝去王金如坐於榻前警策兒數語予哭告之尚能領畧

二十九日同見疾轉劇然依詢予曾飯否以此見兒之

天性甚篤也未刻遂不起為之含殮已雷雨驟至晚
燈下現卽報畫一本予初與王金如言哀而不傷之
義覺於此尚有中節光景

○三十日無迄師來訪與之偕季超兄同至先兄厝所擇
亡兄之地諸親友來慰者或以為予過於曠達予以
兒女之情每苦於有餘父母之情每苦於不足即矯
之犹未為失正也

六月初一日考之文公家禮十六七歲者為上錫得祔
食於祖之旁終兄弟子之身服降一等予遵禮以行
且議以德公兄之孫為先兄立後德公兄遂謝不肯
居午後出於柩園同止祥兄及鄭九華出富山是日
錢麟翁遣西孫來吊

初二日吊者漸多俱成禮而去三兄及翁艾弟設祭於
亡兄季超兄作文証無生之旨不為死者哀而為一
切輪迴之人致痛語、可發深省午後復至富山趙
應侯至復酌而別

初三日草一文哭亡兄錢欽之兄誤聞予待亡兄以成
人之礼以循礼節情托王金如轉為規勉予答王札
大槩以世人於父母之情每不及兒女之情每太過
卽刻意矯持尚亦不失於正予之所以哀而不傷者

此身

初四日延僧為亡兒作佛事午後出視其殯所復至寓

山舟中閱讀書鏡有感於近事

初五日厝亡兒子先兄先嫂之旁午後至寓山下建閣之基

初六日得張太美書寄董玄宰所書扁趙伯章程鐘律

來晤得王康字書惠以儀扁又得姚玄叔王伯彭書午後報謝程鐘律便道晤王雲岫舟中閱春秋於時

酷暑蓋三日矣

初七日避暑園居午後至寓山趙應侯未留之宿

初八日舉放生社於寓山王金如吳與參遠至小憩六

竹菴仍至草堂時王金如與李明初辨難明初屈服

父晚乃歸與內子乘涼于畫舫

初九日作書致張印梁朱石程趙伯章至柯園予出晤

携饌與酌又作書復程鐘律致張撤藩是日與王金

如議施藥事燈下即草募藥條款九條

初十日款出至富山陳氏二表弟過訪偕之以行午後

內子同而兒六至歸與金如復酌施藥事予更定小

引數語

十一日避暑聊整遠山堂襟彙諸書午後閱春秋以

手書三辭王雲岫之招午間徐日現過訪以書致謝
父母言早暎須祈禱

十二日暑熱轉甚閱遜國遺事再閱讀書鏡完作書候
郭太薇黎博菴西公祖

十三日與鄭九華至富山外父以書來若有不能自適
者予力以尋樂為勸午後季超兄借錢溪雲來出村
醪共飲至晚散歸

○十四日與季超兄入城延越中名醫如龔太宇張景岳
凌敬泉吳竺庭徐星峩王培元傅會字王澄陽唐九
有童五萊十人設小酌與之訂約每日輪二人至藥
局每人以六日為期午後王金如率秦六仁吳與參
諸友來亦訂約而去予出謁客晤外父及乘月歸舟
已踰二鼓矣

十五日建小閣初上樑予與鄭九華出視工薄暮赴王
雲岫酌月色皎然涼風忽至暑氣為之少解歸後作
字辭潘鳴岐招是日得梅父母際春及路父母函書
路父母更寄以周挹齋一札

十六日得楊漣漪薛君亮王芳洲張太羹及程弁應璠
書草復各札應酬殊苦

十七日涼爽如初秋至富山歸復草各札且致書于徐

竹孫黃跨千許蓋明尹洞遲午後彭天錫來別

○十八日早得雨午後雨更暢簡醫書送至藥局因以一字與王金如言吾輩有一念好生靈雨隨應誰謂天道與人事遠哉是日季父來始知有冒予家節人於柯市者為之髮指即草札以鳴之邑父母

十九日與翁艾弟同入城至藥局則就醫者紛至矣出吊劉量倩師母及錢家姑王家舅母即飯于王午後復至藥局與王予安及王六師舅談得見沈君正宗毀章觀明書舟中作札復林希菴公祖致朱煥菴丈

二十日致書王雲岫徐日觀趙伯章乞募藥之費與鄭九華至寓山有舊吏作巡司者來謁得許平遠公祖書旋復之午後復得雨

二十一日有山人金日升持李子木書來款彙刺予疏嚴却之鄭九華入城予獨至寓山得張撤藩父母書旋復之再致書于劉心印父母連日讀春秋

二十二日有莆中孝廉余君颺過訪不及晤而去劉心印父母書來草復之王雲岫待於寓山將出適葉暎石來遂與同至寓山德公季起兩兄亦在及午而歸方款閱春秋得王金如札旋復之潘敬亭至

二十三日徐豫允年兄之次公至出豫允書即別去是

二日內子以八月孕。因哭殤子致產洎晚延醫錢心鐸
至即就宿。并書山名。以誌哀。因
二十四日閱春秋內子于午刻產一女午後同鄭九華
至富山是日得王予安所書靜者軒扁予構室名約
名靜即古人几杖為銘意也

二十五日同止祥兄至富山午後作喜雨五古因閱蕭
友向所和予喜雨五律若干首

二十六日與鄭九華方在富山何芝田偕翁艾弟至及
歸趙伯章遇于途亦以遊富山至為芝田作書致孫
東曙長公午後雨喜雨詩成

二十七日至富山得朱楊菴札旋復之又為緝賢祠作
公札午後大雨時翁艾弟告數庄農予恐其奪農時
也為調處之息訟而去

二十八日入城至藥局晤王金如諸兄授兩邑父母刺
以得兩致謝晤羅天樂年兄歸復飯於藥局曹忍生
及錢友宏中者來晤出候外父及謀軒外叔再晤周
又新求其西席趙可孫坐談晚歸每作書與張介子
廣募藥費是日得張玉筍及余君懋儼書

二十九日得沈孟玄及夏弁日璋書復之又作書與朱
孝廉名稷者午後至富山

七月初一日至寓山暇則較先子文集午間舊塾師宋
二既然先生過訪言及及并日誌于後又及於其末

初二日較文集作一書與姚通所公祖路廣心父母午
後王友六七人來晤訴以俗中爭鬪事

初三日至寓山莆中王山人朝鑰來訪返至家晤之午
後再至寓山晚小酌

初四日鄭九華入城予與王朝鑰玩園中假山款刪其
繁雜者覺位置俱工雅感嘆當日卜築之苦午後與

王朝鑰遊柯園仍至寓山
初五日偕鄭九華王朝鑰至柯園止邀祥兄至寓山方披

襟共話于虎角菴適張宗子來訪共飯於靜者軒宗
子出陳章侯所畫懸扁為予指點修築殊為山林增
勝歸而小憩柯園予先抵家宗子再遊密園乃別

初六日初秋方櫛沐甲子園中所首取士林衍明來訪
王朝鑰即于座間為予寫照頃之趙應侯來邀共飯

以次而別是日暨陽兩壽生及醫者錢心鐸俱來
初七日至寓山以魯酒犒各匠午後邀王朝鑰鄭九華

及諸兄弟登畫舫放舟於獨山湖小飯分韻予得八
庚賦七言律再納涼于柯園乃歸是日得

聖楨楊龍友書

初八日吳家甥至云朱集庵過訪待予於富山並操舟
從之與放生社中友共飯六竹菴諸友別者予與鄭
九華憩息靜者軒暑甚歸舟遇異風是日作北候李
金我

初九日至富山較淡生堂集

初十日延王朝鑰為內子寫照時酷熱如季夏初旬

十一日王朝鑰再為內子寫照作書復張太美楊龍友

且乞龍友書扁更轉乞之陳眉公

十二日至富山作書致賈道乾公祖

十三日至富山較淡堂集

十四日王雲岫過訪邀之至富山路廣心父母有書至

十五日出吊族叔周先之見訪午後復周又新同趙可孫

來邀至富山小酌于新閣時月色皎然宿主之情皆

暢又新出富山圖及詩見贈又為予集唐句作對聯

周太留可孫宿

十六日同趙可孫鄭九華入城鄭即別去赴省試予飯

于藥局午後出報謝諸太醫晤鄭訥菴至大東池與

商謙軒共飯于外父家至藥局與金如及諸友談

月上乃歸

十七日林聖植自雲間來談張太美被誣事甚悉午後

即別去

十八日龐穉龍來訪以病卧齋中予與王朝鑰至寓山
歸遣奴子過武林致書許蓋明公祖及復梅父母書
十九日為王朝鑰作書介紹于嚴州二守李君平陽令
許君又作書候薛大年黎博菴兩公祖同王朝鑰至
寓山時止祥從武林歸邀之疊石及夕乃罷

二十日微雨王雲岫至待予于柯園邀之全止祥兄至
寓山午後設小酌餞王朝鑰歸閣

二十一日至寓山督眉兒讀書於柯園先祝叔父壽午
後王雲岫邀全止祥兄酌于其家

二十二日雨入城晤李暎碧公祖張撤藩父母蕭之孝
廣余君颺歸從南塘雨初霽景色甚佳獨遊衆香園
洎暮乃歸

二十三日作書致外父携函兒至寓山適止祥兄全陸
支百金大來至留之飯是日始定爛柯山房之址

二十四日邀王雲岫偕姚完赤先至頃之止祥兄亦至
待劉迅侯金大來未至與客先酌、已而兄乃徐、
來為予指點疊石雲岫別去兩兄留宿柯園

二十五日微雨至柯園同劉迅侯金乳生至山至午止
祥兄邀去予獨在山疊石及半張宗子以格不入試

走札相告為致一字于李暎碧公祖

二十六日雨甚坐紫芝軒作書致林希菴公祖餘以較文集午後少霽至富山晚得張撤藩父母書言別

二十七日至山作五言排律十餘韻錢張父母山中疊石將就

二十八日同內子至山及午歸太醫錢心鐸至為內子

診脉王金如陳白學全至晚小酌金如談藥局事甚悉晚得安蓋卿及寧方兄書

二十九日至富山閱春秋畫半卷

八月初一日至富山閱春秋得許平遠公祖書旋手復之

初二日同內子至山張撤藩父母以書至手復之且為作一函于喻閣西公祖是日得石二枚玲瓏可現當下米顛之拜

初三日以五簋奉叔父及諸兄弟至山小酌趙伯章適至遂同酌焉午間常熟舊簿鄭一綸未謁閱邸報知奴虜合違聲息頗亟

初四日至山督工後掃除塗堊所後幾六七十人而築室遂將告竣

初五日出柝高橋迎外父及譔軒外叔抵家飯罷遊客

園以畫舫至山小酌再遊柯園乃別得周又新書旋
作書與之索書對聯及畫并致一字于趙可孫

初六日雨坐家園作書賀許平遠公祖壽又復鄭參戎
稟是日建爛柯山房

初七日與內子至山作書致張玉筍吳幼民雷雨津族
兄同沈姊丈過訪

初八日暑熱如夏舉放生社至者為潘鳴岐茅心鏡予
至柯園邀止祥兄及金大來同往飯六竹菴午後微

雨讀書山中
初九日上午在園簡吳中書稿付管城子錄出午後至
寓山

初十日得董持阿書且詢其來人言台兵鼓譟事全內
子至山適王南阜過訪午後間龐祥龍來自武林端
歸作札復劉心池父母又致書于林自名公祖

十一日因止祥兄有公車之行設小酌于寓山邀兩族
兄一族侄及德公兄翁艾弟同行適陸五兄訪止祥
兄至亦邀之座中午後約陳白讐携眉兒至山坐月
遠閣各賦五言古一首予感懷時事有西北有烽火
惟極生百憂之句宿靜者軒中

十二日自寓山中發舟至近城饒高謙軒便道至藥局

出訪錢麟武余武貞詢以奴警事言人殊再晤張九山雅夷表兄六師母舅介子表弟及倪兄玄桓歸九曲寓宿

十三日錢麟武余武貞張九山先沒過訪出賀王太公祖新任先共外父坐話別王公祖訪羅天樂歸寓延太醫凌敬泉諸君八人陪之者為張介子王金如李超兄午間方白山至席罷出邀童五萊為內子於脉即飯于外父家乘月復至藥局與王金如暢談金如所以勗予者最切是日周又新過訪得楊龍友書因得其所作畫及所書對聯與陳眉公所書扁額

十四日董天孫過訪予方作書慰陳襄範及復周又新乃出晤之頃之會稽西嚮官至詢以地方事頗懷隱憂別去跨驢訪客晤劉石林即至藥局偕諸友登舟迎陶石梁先生至放舟於青田湖為放生社及會者皆局預事之友亦即證人社中友也飯酌談語情懷甚適諸友別于西門外予獨步入城訪也可居出舟放舟於都泗門待內子同歸

十五日同內子至山先至柯園予作書復楊龍友致候熊心開及高謙軒薄暮趨伯章携酌邀諸兄弟及錢溪雲至山待月復酌于舟中乃別是日祝兄大對過

十六日至山作書後外父同無迹師出訪戴氏諸友仍
至山讀書擅熟異常

十七日作書復徐日觀趙應侯龐禪龍出訪王雲岫雲
瀛聞都門事甚懷杞人之憂至山值宋天岳過訪午
後書日雨行事晚歸許平遠公祖邀至道左劇談及
子夜乃別

十八日老母至峽山何姊家坐書室簡新收書日凡得
書三十餘種得閱高皇帝御製文集午後至富山
讀春秋微雨即歸

十九日至峽山何姊所建之靜室祝老母壽天雨蔬飯
罷稍霽即歸鈕君之選以崇明簿來晤道當日獄變
事

二十日入城晤謝需霖公祖出於蓬萊驛晤劉心印父
母午後携眉兒就醫于張景岳即至外父家便道晤
黃進及表且如之乃即旋舟歸是日作施藥紀事訖

二十一日邀王雲岫雲瀛沈克俞潘鳴岐趙應侯并偕
奕遠侄小酌富山止祥兄之白柯園以入城先別諸
友酣飲至暮後催花擊鼓進巨觴至月出乃散趙應
侯留宿山中

二十二日得許平遠公祖書手復之同起季兄至富山
候孀母病于柯園適錢溪雲張有度遇諸途同入山
禮佛時無迹師延衆僧誦法華經晚施餼口食予草
疏文一通以達情旨午後葉暎石來訪趙應侯別卷
二十三日秋分舉時祭王大舍過訪与止祥兄留之蔬
酌午後赴沈克俞席同席為潘鳴岐潘起潛舟中作
致來澤蘭公書及与澤蘭乃即書

二十四日至富山懸扁額聞錢溪雲過訪亟歸內子同
諸姊如為老母稱觴于山中予作書致季子米詢以
都中虜狀及吾輩所以自處之策又作一字上外父
是日陳自魯至

二十五日兩生齋頭讀春秋盡半卷

二十六日致書外父錢溪雲來告以買山成事午後同
內子至富山是日浙中出秋榜

二十七日偕無跡師出訪潘張錢諸君晤張思東還山
讀書先是何芝田以富園詩見投時芝田亦開果園
走筆作五言古和之

二十八日整書架上同內子至山作重建融光橋碑記
是日得外父兩書

二十九日贈熱如夏予方跨驢欲至山遠路父母未期

一晤出于堰下晤之始知南中新榜名姓午後至寓
山日行七八百里

三十日入城晤謝海規父母訪張宗子介子不值午後
訪周又新即至外父所餘姚朱玉籀父母邀予一晤
至長春觀報謝之復至周又新齋頭與金乳生趙可
孫及止祥兄小酌歸舟作書答路廣心父母

九月初一日五鼓發舟暫泊梅山作昨日小集詩二律
王天含遣人來邀隨至路庄王金如金士望迎晤于
舟次至大含尊人墓所題主龍蔬酌于其家作別將
暮矣行不十數里遇風雨與王金如同宿舟中絕爨
以餅餌充饑

初二日已後始抵家大雨不已趙應侯至留宿齋中是
日得朱玉籀路廣心兩父母書復之

初三日兩作書致郭太薇姚通所兩公祖又以數行致
止祥兄時已先至武林矣作贈祝節母詩完與趙應
侯陳自學共閱之別王金如入城

初四日微雨趙應侯與季超兄赴証人社會予不及預
至嵩山竟日獨坐閱春秋竟全卷得周又新書贈以
雅集詩八首

初五日與丙子及丙兒至山丙子先歸予留山中午後

會計石工

初六日董持阿乃弟至出持阿書因得林自名公祖札
會董兄及趙應侯至山歸舉小酌薄暮復至山植卷
木晚作書致許平遠林自名西公祖及復董持阿

初七日微雨趙應侯作別莆中友黃君卷來不及晤而
去予至山植卷間錢溪雲張酉度相訪趨歸飯後作
書復外父小睡起閱左傳竟全卷作字與張介子邀
與雅集

初八日雨甚與兄弟至六竹菴放生社中至者止王雲
由間何芝田過訪即歸時王大舍亦至留之宿晚酌
聚談甚暢

初九日王大舍別去德公兄治饌作登高之會與何芝
田錢溪雲放舟至城邀劉北生王子仙共登西施山
薄暮至外父所居之咏離堂風雨不為阻也及晚始
有晴色

初十日新霽出於柯園邀止祥兄頃之何芝田亦至同
之寓山少頃張宗子介子平子昆仲同舟至待周又
新趙可孫及午至舉酌坐間周又新趙可孫各出新
詩披閱甚快燭下共拈韻牌集字成詩二鼓乃別
十一日邀朱仲含叔起同陳章侯來舉酌演拜月記席

半出遊寓山及暮乃別是日姚玄叔同乃即過訪別酌之半餘即別

十一日老母至寓山予在書齋作書致路廣心石景雲午後跨驢至山督庄奴植卷是日王雲岫過訪因惠以天竹數株

十三日得林白名公祖及朱玉籀父母書朱書即於舟次復之與季超兄及錢溪雲放舟至城邀王子仙繇望仙橋散步款探陽明洞草木蒙翳日漸西落不深至而歸夜泊庄前

十四日肩輿入化鹿山拜先子墓道過寺前溪岸衝額予稍為捐助經理携僧圓見觀新置小山適章近明過訪有表姓者載酒舉酌復分乃罷

十五日出山午刻登舟道繇越城謁高家姑舟中閱杜詩有感於開元時事因嘆今日虜騎縱橫人民塗炭閱九邊輯畧幾終卷及暮抵家

十六日與鄭九華奕遠任出訪王雲岫偕過桐山時雲岫有卜築之興為予指亭榭處足為園林勝場作別至富山季父已先在矣予與鄭九華抵暮乃歸是日作書復父外及周又新趙可孫王家舅

十七日錢友宏中過訪出諸臣清畫扇見贈稍簡理恒

產午後作書與劉心印父母及來澤蘭卽君是晚與
內子放舟入城

十八日早至外父家飯後予出投謝父母刺歸值張介
子同之至外母墓所外父鼓酌於西施山之清映軒
予復出訪張景岳酌藥方歸舟已在子夜矣舟中作
書致鄭壽子姚玄叔龐釋龍暇則閱葩經

十九日與鄭九華至寓山督庄如種桃堤上午於齋頭
小憩起德公兄自城歸談至日夕季起兄偕葉瑛石
錢溪雲又自山中歸踐上方下地之約

二十日同葉錢兩君及鄭九華季起兄放舟上方將出
得吳二如書携以仁和宋父母一札卽於舟次復之
及山下葵皆吉飯于龍山廟歸舟便道至西余山謁
何石湖墓送張淩華舍周家橋歸

二十一日五鼓發舟入城與鄭九華葉瑛石小憩於陸
放翁祠之快園出晤張介子卽晤謝霽霖公祖歸舟
張介子王雅夷來晤飯後舟南門晤張九山陳襄範
至府庠與諸廣文估鄉賢祠基復晤張君維煥及王
家兩舅歸舟中作書復汪照隣日所行事

二十二日作書葉瑛石經畫賢祠事竟日坐書室閱葩
經

二十三日與鄭九華至富山完璞師在菴予與奕棋不分勝負分韻作靜者軒五言律晚閱王文成公語錄
二十四日得姚玄叔鄭玄子壽子書入城會謝父母有志去請挽留之適王遂東與諸孝廉在座再同王遂東詣府外父同諸縉紳在別王公祖至府庠同鄭九華王雅夷估計賢祠即飯于雅夷家飯後同遊自遠軒墨池皆外叔祖所構也再遊秋水園歸舟即作諸園小記

二十五日得江然明書獲閱詩傳闡款往富山不果董持阿乃弟至言持阿以兵諱被誣予立為作書致鄭太薇

二十六日得張太美朱玉篇及柯孝廉鳳帟書途密師無跡師及僧大和相繼來晤午後同內子入山壘石以植蒼木是日作書致李金歲

二十七日林自名過訪予邀晤于中途即舉酌密園再興遊富山又送之至舟次乃別竟日之談頗為盡懽座間始知莆中新榜有十七人及閩奴虜出口之報晚作書復董持阿

二十八日出於弥陀寺訪途密師午後閱王文成公集及子貢詩傳有見于朱註之謬

二十九日與鄭九華至寓山張西度趙伯章過訪暇則
閱楞嚴經晚歸作書致謝父母言鄉賢祠事時謝父
母以賢祠營建款動行區予力止之

三十日得郭太薇書作札與劉心池路廣心朱玉籀三
父母及趙伯章簿暮款至山不果是日趙友懷璧及
王子開來晤

十月初一日得王雲岫書趙應侯至遠有色并希賢亦
托其親王君來晤趙應侯別至暨陽王南華來晤午
後與內子至寓山是日閱中庸起

初二日周又新曹忍生秦三廣文携酌相餉即就
予之庖人飯于紫芝軒與之遊柯園再酌寓山之遠
閣及暮乃別座中間東省有士子之譁

初三日入城至府庠估計賢祠議於十一日興工便中
校數刺即至外舅家時武子舅有遺孤搏九舅繼之
為嗣舉酌延族予預為觀白兔記舟中作園記閱詩
經

初四日與諸兄弟及鄭九華將入城適吳中楊生名亭
者橋梓見訪示以去思碑記余避謝不敢當別去旋
至徐陀寺報謝之及城校數刺至寓陶先生與諸友
至舉聖賢各有受用處令學人自為尋繹午後出晤

謝父母即歸

初五日與內子至寓山午後續中庸語予聞陶先講學語有款項者作問難一則詢之王金如先生

初六日與鄭九華至寓山閱杜詩及楞嚴經因士女游觀甚衆午後即歸閱文成語錄晚作札與王雅夷張介子王六師舅乞卷竹

初七日為謝父母作仁聲錄序戴君國光來晤拜孀母壽薄暮携內子入山遂宿於爛柯山房

初八日為內子誕日放生諸社友畢集禪師途密歷然無量俱至自舉社以來是會最盛午後與途密談因果與氣質之異同及省事收心之要晚懸燈山中與內子觀之為樂是日得沈雲外父母書

初九日歸家祝嫂姊壽致祖母祭仍出至山與無迹師市卷於山下一老媪得數種并所乞梅樹植之山上蒼鬱可觀晚與內子舉酌

初十日內子先歸鄭九華錢溪雲翁艾弟來盤桓於山中至暮予閱杜詩終卷晚歸老母六從何家姊靜修

處歸

十一日較正所書詩傳趙友懷壁來晤午後與鄭九華季超先放舟錢溪雲來自中途及暮始抵上方乘月

步至構墓之所宿於舟中
十二日卯刻為先兄嫂築閣土迎趙鼎石乃即來晤商
以慰山主張百度亦至及暮定墓後事乃歸

十三日與止祥兄鄭九華入城吊謝父母即至鄉賢祠
看工值張九山董黃遑午後出謁外父晤虞山孝廉
蔣晚仙歸舟晤周先之是日得尹洞遑路廣心趙應
侯書

十四日與鄭九華較正先賢入祀典者現存神位較志
書遺失為多當有補舉之意得許平遠書勸予出山
報謝之語以倦遊之意午後作書候沈雲升與鄭九
華錢雲溪至西澤訪客溪雲別歸垵里予步月歸晚
以鄉賢事商之張九山

十五日出於路南看了氏房屋歸製藥午後與鄭九華
至寓山

十六日與鄭九華及携眉兒親侄至山讀書午後內子
携朋兒二女亦至予僅玩杜詩數首而已是日始規
畫鑿池築堤之地

十七日與止祥兄及鄭九華并兒侄至寓山讀書吳甥
友及隣居王姓者先後來晤及晚得鈕君之選書

十八日得參戎鄭君司李夏公祖書予與鄭九華出于

管聖看趙氏房屋從福嚴村入渚湖歸表兄王君僕
來晤午後作書致馮甸仙董持阿

十九日從南塘入城賀王太公祖壽歸於舟次作書致
王公祖王稚夷來晤午後出唁謝觀海父母至鄉賢
祠看工晤張九山及王家舅抵舟張九山來訪即別
去舟次作書復夏雲韓公祖劉亮倩師

二十日雨得姚玄叔趙應侯書午後至上方山督造壙
上宿于舟中雨竟夜閱詩經三十餘篇

二十一日季超兄自家至山延張西度及其乃侄孫至
定山界即舉酌于舟中薄暮放舟抵家

二十二日同鄭九華及季超兄止祥兄翁艾弟并兒侄
輩至寓山程尔曠及鄭君國寶來訪時有偷兒盜無
跡師放生之背追獲之諭以改行從善慰諭而各

二十三日出弥陀寺與諸兄弟晤途密師移舟待朱玉
籀父母不至午後出訪王雲岫值其搜石桐山即於
山下晤之復二鼓得文載弟北榜魁選報

二十四日出晤朱父母即垂顧於家同止祥兄迎之同
鄭九華錢溪雲季超兄至上方山舟中作書致林自
名鄭玄子及朱玉籀父母視工之暇披閱龍經

二十五日雨在山視工午後雨甚乃撤工放舟歸季父

以報榜舉小酌夜宿舟中即同鄭九華入城

二十六日至寓值王麗青公祖來訪即晤出賃閩人孟公祖新任與外父晤語於巡道司歸而路廣心劇寃穀兩父母來訪亦晤之出後數刺即返舟再晤錢陽明祝君大對乃歸舟中作書致路父母并復朱玉籀父母書歸更得朱父母及張太美書

二十七日又得朱父母書有武林之訂與趙伯章史姊丈至富山時方款鑿池山下先是與鄭九華嘗作圖規畫至是始開工午後啟舟至西陵作致喻醒拙黃跨午兩公祖書

二十八日早渡江待鄭訥菴年伯於曹恣生家不至投鄧紫瀾公祖刺晤朱玉籀父母及至寓陳襄範來訪飯後出晤鄭訥菴以小艇至昭慶寺及板橋邊晤王可姜神超姜同話於舟中至寓共鄭訥菴晤乃別晚與魏行之宿越閩大風竟夜

二十九日出晤陳襄範旋與鄭訥菴同晤黃跨午公祖即款渡江值姚玄叔來晤再出晤朱父母及抵西陵日將暮矣晤馬芝嶠年兄舟中復閱葩經

十一月初一日為先人諱日文載弟舉戲不敢觀也門人郭介菴來訪聽其節儉之道真不愧介字可謂能

卓然自立者矣予為許閣其憲藝九首何芝田至別
去葉暎石携餘杭董友天楠過訪同至富山小飲作
別郭介菴亦行晚作書復孔林姚競初師

初

二日兩宜邑徐君懋暎至以乃兄新發南榜曾經予
巡方時所訊者倪三蘭款因是糾參故過訪出乃
兄札及辨揭硃卷相示談久別去午後作堂呈道予
不能赴補之狀燈下觀圭峯禪師語錄有會手錄之

初

三日文載弟暨旌作書致張玉筍復張太美午間文
載弟舉酌覲戲謝海現父母以饋札行与止祥兄出
送之晚作書致唐存臆堂翁及宋又希道長

初

四日與鄭九華至富山即送柯市戴家橋至華舍遊
趙叻仲硯園午後方至上方山料理坟工及暮而歸
舟中閱王文成公平橫水三淵之略因嘆先生用兵
之神古今所罕見也燈下作書致李藩谿及文載弟
又族中一二在都門者

初

五日得李暎碧公祖書周又新贈文石一枚并書袖
海二字以贈取東坡我携此石去袖中有東海句身
午後與鄭九華止祥兄奕遠侄至富山待王雲岫不
至

初

六日為太室先兄及先嫂遷柩至上方山即宿于舟

初七日寅刻奠先兄嫂及殤兒已小憇起王雲岫以祀
土至應酬諸吊客去同季超兄歸舟中作書復黃跨
午公祖朱明京薦師

初八日絨呈揭附之都門與內子至富山歸金家舅來
晤午後至上方山與鄭九華張百度錢溪雲葉暎石
小酌即宿舟中

初九日諸兄弟俱至拜墓午後與錢溪雲季超兄登上
方之巔遊拱星菴中祀純陽像菴前奇石壁立登峯
望海嵐有霞舉之思及暮乃放舟歸

初十日王雲岫款卜築桐山戴姓有起而爭之者予與
諸兄弟及錢溪雲趙伯章至山為之調停歡然罷去
小酌于雲岫家午後至富山率庄奴種桃李見搜石
有奇峭者心甚樂之晚與鄭九華會計石工

十一日理俗務至停午始至富山及晚而歸再會計石
工

十二日同內子入城舟中作書致周又新徐日觀再復
張太羨林聖禎予以小舟至府庠看鄉賢祠工至外
父家飯後延童五菜脰胍舟中作書復倪三蘭

十三日止祥兄上公車設饌送之至太平橋作別即以

小舟抵富山舟中作書復許平遠公祖及周先之兄
以數行致趙應侯作刻溪之遊

十四日山中鑿池於是日興工莆田林春元名佳育者
過訪與之遊富山山至晚始別得朱春元璘如書

十五日至富山設齋延途客歷然無量無跡一純休量
六禪師小坐諸兄弟六預焉客途師談禪步月夜分
乃歸

十六日文載弟舉登科祭祖趙應侯至午後與之至富山
發晚舟回九華趙應侯季超兄至越城待王金如不
至遂夜行

十七日早過東關以前途水淺不能行復折而西道經
天華寺入訪三宜師值陶金澗先生將抵萬壩二三
為清水開鑿石通流層折幽邃及渡壩先遊萬壩菴
溯江而上約二十里許有石嶺焉特出俗呼為指石
自此削壁重崖迫臨江上負載者蟻山半石斷處以
棧道接之即謝太傅高卧東山也褰裳就之從松徑
委折而登林風謾々令人有高世之想徑旁有洗履
池一泓水身薔薇洞僅存其名入徑約二里許見紺
殿琳宮為途密師所重創也有僧太虛指導從寺後
謁三太傅祠一旁謝安石墓在焉復從西披荆步榛

一峯迥立四山皆環仗於下江流如帶琵琶洲迴繞
之即所為西眺也時西日將落赤霞與翠嶽相映如
一琉璃瓶貯五色摩尼及解維以行少頃則月上矣
因老杜星隨平野濶日湧大江之句更不能贅一語
惟偶拈東山之律聊解山靈嘲身值陶石梁先生亦
至剡會葬過舟談數語別去就寢泊舟於莊家埠

十八日晚發風色甚厲辰初抵三界登岸待鄭九華小
憩城隍廟乃知此地為古姑寧縣也傳至樞浦石
壁數十仞橫亘江上蒼翠之色斑剝如高懸周鼎為
剡溪最勝處再數里抵清風嶺謁王節婦祠讀其所
為詩千載後凜凜有生氣薄暮過仙岩步自黃沙寺
宿行十餘里泊舟

十九日早飯後至艇湖觀劉父母所建塔其下有子猷
橋俗傳為王子猷訪戴回棹處再數里至羅星臺觀
然水中央周海門先生所建也午後至嵎城寓於周
祠過訪周先之昆仲陶石梁陶樵曲已先至矣劉宛
穀父母過訪即出報謝之并謁喻養初及王存拙乃
即

二十日周海門先生舉葬出自北門予供祀土之後迎
候劉父母於蕭寺中事畢趨歸出發廣文葉君徹奇

宣城梅君鴻中梅君為禹金先生孫惠以先生所輯
文紀再晤袁清侯袁則學周華頂及後周族與海門
先生門下士三四人刺即與西陶君赴劉父母召席
散抵舟與王金如同行

二十一日侵晚已過樺浦午後散步於東山之趾鑿石
為道下臨江流神色為之聳然及暮抵蕙埭飯於逆
旅主人與王金如別宿於舟中

二十二日為予初度晨侵曉抵陶堰飯于漚谷之閣上
偕遊秋水園陶姊丈去病至即過訪其家再訪石梁
先生適徐檀燕亦至遂為吼山之約同陶書倉去病
至山層樓複閣朱欄曲檻書倉新構也據獅石之
巔觀空水無際澄泓於下登高臨深一回一叫絕石
梁舉酌方半棹舟以遊時有女伴携歌姬至邀演數
劇徐檀燕劇醉乃別

二十三日抵家王友觀瀛昆仲過訪即與趙應侯至寓
山作書復張太素及顧世文循又致一書於倪三蘭
乃即內子自外家歸

二十四日入城謁羅和陽公祖至府庠視鄉賢工羅公
祖耒晤於寓出吊朱懋現再晤外父乃歸舟中作書
復鄭泰戎

二十五日為冬至節祀祖訖會計贍族之費午後至寓山是日得周玄中薦師書勸予出山

二十六日苦中唐期遠至弥陀寺訪逸密師予出晤之即歸携兒侄入山作書致劉煥徽復王六師舅午後園杜詩戴兄來晤

二十七日至六竹菴舟山吳氏四君來予易其田以鑿池別去方園杜詩戴氏兩兄及沈氏表兄先後至天微雨遊人甚盛中多衲子是日始鑿北面池兼築東西長堤晚得寧方兄書

二十八日招族中兄弟侄輩六人酣飲于寓山薄暮始散家中演戲奉老母金大來以生子舉酌王雲岫劉北生皆至予先別登舟為掃墓之後

二十九日早至夏履橋以肩輿至資壽山時天氣如三春山間梅花有盛開者為文載弟暨旗墓亭及歸日西落矣夜放舟歸

三十日劉北生王子仙趙伯章與諸兄弟俱遊寓山予亦約王雲岫至舉小酌已皆別去鄭九華白剡來及暮同歸作書復寧方兄又致書董持阿

十二月初一日雨鄭九華往寓山董工予靜坐書室閱詩經

初二日入城同鄭九華至鄉賢祠與秦廣文會計工後
午飯後復至彼織書復覈及晚乃返道遇王雅夷談
久歸舟發入祠知單及祭享儀注

初三日雨至富山董天孫過訪拈韻作五言一律留天
孫宿得朱廣文書作書致劉念臺王金如

初四日天孫去延董持阿小酌薄暮別去得秦廣文書
作書致王鹿青公祖以祠費乞其捐助

初五日霽與鄭九華至富山頃之季超兄翁兄弟亦至
赴休量師齋王雲岫偶過訪姚同伯亦來同之歸晚
赴族兄酌

初六日入城以鄉賢祠告成公送府公祖請啓縉紳至
者為董黃庭徐檀燕朱集菴王雲岫晤王鹿青公祖
適李洵磐以巡滇復舍北上值於府館復至外父家
晤之別去至賢祠晤陳襄範乃歸

初七日有寒色與鄭九華至富山止孟兄同柯山朱君
來晤是日老母謝神演戲予及暮戲罷乃歸

初八日入城便道訪途密師午後出至賢祠銓次列諸
賢神位晚作一揭以致正先賢祀典擬府邑應合祀
者七十餘人尚有耆賢未舉者數人求當事者議行
再作書復徐日觀

初九日得李浦磐書手復之出至賢祠掃除室宇覺規制已煥然矣午後羅公祖及陸景鄰乃即來晤復出至賢祠晤陳襄範及姚競初師歸寓何芝田王金如來晤

初十日早至賢祠諸後裔先後以神位迎入紳衿雲集為一時盛典縉紳至者為外父及胡璞完姚競初師羅天樂董黃庭王範我陶石梁朱集菴陶書倉張自菴何和陽并李王兩春元子孫設祭畢有推首事致謝予者愧不敢當頃之府廳公祖至再舉祭遂舉酌於明倫堂成禮而散予飯於王雅夷家歸閱劉止菴

年伯語錄

十一日以羅和陽公祖辭篆適面達之謝海觀公祖至府學謝廣文先生晤張辟玉再至捕廳晤羅公祖遂赴姚競初席先待於葉氏之澄玉亭同席為姚履素席罷約一鼓登舟為羅公祖作公書致道府公祖

十二日風寒至寓山舟中作書復劉心池父母坐爛柯山房閱陽明先生語錄歸與季父夜談

十三日至寓山便道訪朱君不值以風雨即駕舟歸午後睡起讀詩經先是周無執乃即以一札授予將有闕牆之變予作札力止之晚書日所行事

十四日大風竟後日午後有微雪取篋中書予曾許閱者
另置之架上經子史約十餘種愧不能記憶耳作字
與錢德輿求麟武翁書扁

十五日曉望山頭積雪為風吹捲殆盡予與鄭九華至
寓山午後訪王雲岫寒風復起款至其所構形園不
果歸書齋閱陽語錄明晚閱中庸

十六日得李夔龍年兄書作書與陶石果索扁字又致
札王金如時劉先生夫人喪風威尚勁款出至寓山
中道返午後作書致吳儉齋蔡翹先及喻醒拙公祖

十七日與陳自譽翁兄弟出至寓山始暨浴花臺亭有
文學徐彬來晤午間舉酌為陳自譽作別晚閱中庸
十八日款至寓山以冰堅舟不得進僅抵柯園即歸朱
六兄以結婚未出晤之留小酌別後與趙伯章至山
晚歸閱中庸是日得來澤蘭書

十九日令里書會計戶籍至山閱陽明語錄完督兒侄
讀書山中族侄及徐姓者先後來晤

二十日董天孫過訪出新詩以示午後陳自譽偕董持
阿來晚閱中庸作札致喻醒拙來澤蘭許平遠

二十一日入城鄭九華別歸刻出吊劉念臺夫人先待
於戒珠寺值錢德輿得錢麟武所書扁字午後出報

謝以賢祠投刺者有邵君晤於舟次邵為閣幕曰共
事也

二十二日偕兒輩入寓山隣人王君故人茅君宗憲子
皆未晤午後方閱書蕭邑趙君有章以劉心印父母
書來即復之晚作書致李映碧公祖

二十三日入城待奴子於彤山王雲岫來晤抵偏門以
肩輿將閩人孟公祖公奠劉念臺夫人晤會稽司訓
曹陳兩君歸舟王雅夷宣大兄未晤出晤張介子宗
子昆仲歸於舟次作書致王康宇劉心印復林白名
公祖

二十四日散贍銀於族中貧窘者至寓山夏孔林及戴
君國英陳君錫祉先後來晤得王求如書作札致黃
海岸公祖復鄭壽子

二十五日得汪然明書偕兒輩至寓山得路廣心父母
書是日小橋告成作札復王求如朱廣文

二十六日至社廟散米於近村貧者午後至寓山

二十七日早至南山送舅母之殯仍供祀土後舟中遇
微雪北風甚勁予與王升之張介子閒步龍筠庄今
已屬姜歲勝改為集錦山房次至南華館再至鏡波
館更繇田間至天鏡園歸舟讀中庸始畢

二十八日至富山關工將告成王還淳國潘友來晤學
吏齋朱廣文書至即同歸作書餽王雲岫辛盤

二十九日簡向來所刻書板如牧津西事案之類度之
架上得張宗子書燈下閱杜詩終卷

三十日得文載弟書簡披閱過書籍彙置笥中因閱袁
石公瓶史及山林經濟籍午後與內子至富山作札
復張撤蒲父母燈下作除夕五律

